

德

弇山堂別集卷六

吳郡王世貞元美著

皇明異典述序

夫國之有典也則號令慶罰皆在焉其曰典者何志
常也曰異典者何志非常也諸創國者皆不爲常者
也其業可大而法可久習之則爲常是故曰典也自
古有天下之盛者莫過唐虞三代唐有天下舉畝畝
之鰥民而委之政旣得政則繼天子之所任岳牧侯
伯而僂之旣僂之而復峻用其子其後輒舉祖宗之
人民社稷而付之商有天下舉五就之遁臣而委之

政既托孤而廢其主廢而旋復焉尊之曰阿衡而待之以不臣周借其國付渭川之釣叟使埽父稱而師事之又以其幼子托之於介弟使据君位而朝諸侯其歿也又崇以天子之禮樂典而異者孰並哉及其衰也以定王却楚之晉文尚能守空名之隧而不肯予以九合諸侯之齊桓其相國尚能守陪臣之分而不敢渝非衰主之賢而創主之易也其勢殊也明興高帝取天下於腥穢之虜勢不得不有所更革天造草昧事取意裁及未討論至末年而始截如矣其始不能無異也雖然異而非異也易世而後或革或因

乘時變通加以潤色固無論已其它或不無一時之好而有所登進或不考於甲令之舊而有所抵迕或飾喜出於燕暱而少折衷或疑功歸之惟重而未爲衡或假無方之立而不必公或取政府之徇而不必當或言路啟於新進而不暇詳或曹局迫於奉行而不暇執主之者快而旁覩者駭授之者以爲常而受之者以爲異也余故識而述之其有抑斥者亦附焉凡十卷以從異日稗官之後

皇明異典述一

再上祖宗號

嘉靖十八年改上

太宗體天弘道高明廣運聖武神功純仁至孝文皇帝尊號爲

成祖啟天弘道高明肇運聖武神功純仁至孝文皇帝加上

皇考恭睿淵仁寬穆純聖獻皇帝尊號爲

睿宗知天守道洪德淵仁寬穆純聖恭儉敬文獻皇帝按

世宗欲罷

太宗之配天而宗祀

獻皇於明堂以配上帝故有所更置耳

天子別號

正德五年

上自號大慶法王西天覺道圓明自在大定慧佛特給黃金印白玉軸頭誥命嘉靖三十五年恩封

睿宗爲三天金闕無上玉堂都仙法主玄元道德哲慧聖尊開真仁化大帝

獻皇后爲三天金闕無上玉堂揔仙法主玄元道德哲慧聖母慈化天后

孝烈方皇后爲九天金闕玉堂輔聖天后掌仙妙化

元君

上初封靈霄上清統雷元陽妙一飛玄真君加封九天弘教普濟生靈掌陰陽功過大道思仁紫極仙翁一陽真人元虛玄應開化伏魔忠孝帝君再加太上大羅天仙紫極長生聖智昭靈統三元證應玉虛總掌五雷大真人玄都境萬壽帝君自是至四十五年又不可勝紀矣

天子爵封

高皇帝初渡江下太平稱行中書省馬步水軍大元帥下建業稱江南等處行中書省中書右丞相吳國

公尋進吳王皆諸將推而以宋龍鳳主命行之也

正德十三年七月司禮監太監蕭敬傳奉

聖旨近年以來虜酋犯順屢害四方兵戎廢弛其遼東宣府大同延綏陝西寧夏甘肅尤爲要任今特命總督軍務威武大將軍總兵官朱壽統率六師分布人馬或攻或守即寫各地方制勅與之使其必掃腥羶靖安民物至於河南山西東北直隸倘有小寇亦各給與勅書使率各路人馬剪削朱壽者

上所自命名也尋召內閣九卿科道官於左順門諭旨皆泣諫弗納八月手勅吏部總督軍務威武大將

軍總兵官朱壽統領六師掃除邊患累建奇功特加封鎮國公歲支祿米五千石吏部如勅諭奉行該尚書陸完等執奏不聽仍批注于後軍都督府帶俸十四年正月手勅吏部鎮國公朱壽特加大師又傳旨諭吏部總督軍務威武大將軍太師鎮國公朱壽今往南北兩直隸山東泰安州等處尊奉聖像供獻香帛祈福安民內閣部院科道部屬官極諫不聽八月傳

旨寧王宸濠悖逆天道謀為不軌擅殺巡撫等官燒燬府縣荼毒生靈傳聞已至湖口將犯南京即令總

督軍務威武大將軍總兵官後軍都督府太師鎮國公朱壽親統各鎮官軍征勦又傳

旨朕親率六師奉天征討仍托總督軍務威武大將軍鎮國公名號還寫制勅便於行事

三祖爵封

高皇帝之曾祖四九公宋龍鳳九年贈資德大夫江南等處行中書省右丞上護軍司空吳國公是曰懿祖配侯氏贈公夫人祖初一公贈光祿大夫江南等處行中書省平章政事柱國司徒吳國公是曰熙祖配王氏贈公夫人父五四公諱世瑯贈開府儀同三

司上柱國錄軍國重事中書右丞相太尉吳國公是
曰仁祖配陳氏贈公夫人豈諸將臣上之而以宋龍
鳳之制行之耶抑龍鳳主來見策也

兩宮並尊

憲宗初 嫡母錢上徽號曰 慈懿皇太后生母周
曰 皇太后 錢太后崩 周太后始有聖慈仁壽
之號

正德中 母后張已上徽號曰 慈壽皇太后矣

嘉靖初加尊號曰 昭聖慈壽皇太后稱皇伯母而

聖母將止稱聖皇太后三年加 張太后尊號曰

昭聖康惠慈壽而 蔣太后亦加號曰 章聖慈仁
然尚有二字異也十五年 昭聖加恭安二字於康
惠上而 章聖加康靖貞壽於慈仁下遂並加八字
無別矣

隆慶六年

今上即位上嫡母陳號曰 仁聖皇太后生母李號
曰 慈聖皇太后而萬曆六年加懿安於仁聖上加
昭文於慈聖上十一年仁聖復加康靜二字慈聖亦
加明肅二字蓋不惟等重無別而字義之微亦微軒
輕矣

親王賜道號

世宗末賜徽王厚燾號忠孝一真人遼王憲儼號

一真人黃金印大於國寶後皆追奪

親王將兵

國初 皇姪文正以總兵鎮洪都諸將悉聽節制後秦王征西虜晉王燕王征北虜楚王湘王征五開洞蠻俱領勅爲大將統兵公侯皆聽節制有功末樂元年初下京師

制高陽郡王高煦克征虜副將軍北平開原諸衛及從征官軍悉聽節制

親王授官

國初 皇姪文正初爲同僉書樞密院事特拜大都督府大都督 秦王爲宗人令 晉王燕王爲左右宗人正 周王楚王爲左右宗人俱正一品

諸王公主初定歲祿

九年定諸王公主歲供之數親王歲支米五萬石鈔二萬五千貫錦四十疋紵絲三萬疋紗羅各一百疋絹五百疋冬夏布各一千疋綿二千兩鹽二百引茶一千斤馬疋草料月支五十匹靖江王府歲米二萬石鈔一萬貫餘比親王減半馬匹草料月支二十四

公主未受封者歲支紵絲一十疋紗一十疋羅一十疋絹三十疋夏布三十疋木棉布三十疋綿二百兩已受封者莊田一所歲收糧一千五百石鈔二千貫親王子男夫受封者歲支紵絲羅絹冬夏布綿同公主女半之男已封郡王者歲米六千石鈔二千八百貫錦十疋紵絲五十疋羅二十五疋紗二十五疋絹一百疋夏布一百疋木棉布一百疋綿五百兩鹽五十引茶三百斤馬匹草料月支十匹女已受封及嫁者歲米一千石鈔一千四百貫親王世子歲賜同郡王郡王之子襲封者比始封郡王減半郡王女縣主

已嫁者歲米五百石鈔五百貫後至二十二年以物力不給更定爲今制自初封十王之外未有沾被者親王歲祿之異

親王歲祿萬石攷宣德元年周王歲祿加至二萬石以太宗母弟也漢趙二王又加至各三萬石以太宗親子也若代王六千石唐王五千石韓王三千石伊王遼王二千石岷王一千五百石肅王一千石則以邊餉之不繼或多賜莊田草場以益之非有隆殺也

親王功賞之厚

宗王以賢德維藩不當有戰功而

高帝則獨重之洪武中秦晉燕數北征有功賞最重楚湘次之其可考者晉燕二府賜鈔各一百萬錠楚王征雲南阿魯禿等處賜秦馬三千匹黃牛二千頭犍牛一千頭羊九千隻

宋樂賞谷王穗金川門功樂七奏衛士三百金銀大劍金三百兩銀三千兩鈔三萬錠綵幣三百疋良馬四匹金籠鞍轡二副又馬二十四匹金鞍二副銀五百兩鈔四萬六千錠錦十疋紵絲綾羅各六十疋絹百九十疋又銀千兩鈔三萬錠袍衣二襲絹五百疋

白兜羅綿一條西洋布三十疋檀香三百斤降真香五百斤胡椒蘇木各千斤良馬十疋羊百羴酒五百甔椰子三百火者百人賞蜀王椿發谷府反謀功黃金二百兩銀千兩鈔四萬錠玉帶一金織袞龍紵絲紗羅衣九襲紵絲紗羅各五十疋絨錦十疋綵絹千疋兜羅綿十條高麗布一百疋白米千石胡椒千斤良馬十疋金鞍二副又銀四千五百兩鈔十萬錠米萬石紵絲五百疋紗羅各二百五十疋絹一千疋兜羅綿六十條蘇木五千斤胡椒三千斤玳瑁一百九十二兩馬一百五匹金鞍二副火者百人洪熙賞趙

王高燧 山陵功白金三千兩鈔三萬貫綵幣二百
表裏馬十匹

親王誕辰特頒

永樂初周定王橚誕辰賜冠一通天犀帶一綵幣三
十疋金香爐合各一玉觀音金銅佛各一鈔八千錠
羊十腔酒百餅立春賜綵幣三十疋珠翠春花各四
十枝酒千餅羊百牽馬十匹金鞍一副按我 朝諸
王於此二節例無慶賜獨定王以同母弟得之至王
薨而後已蓋特恩也

親王封國改建

洪武初封吳王橚改封周王封豫王桂改封代王封
漢王棖改封肅王封衛王植改封遼王

親王降封

永樂中徐王允熾降封甌寧王奉懿文 皇太子祀
郡王同親王

高皇之世 皇姪文正以大都督總制南昌摧陳友
諒後雖用驕僭致殞而念親念勲 上實不忘故其
子守謙雖封郡王冠止七旒祿止二千石而特設內
外承奉長史等官宮城莊田宗社之類皆與親王等
宗王獻詩獎賞

洪熙元年韓王冲焮襄陵王冲焮樂平王冲焮各獻詩頌 上嘆而嘉之賜 勅獎諭北之東平河間仍賚韓王白金五百兩鈔六千錠錦六匹紵絲二十表裏紗羅各二十疋二王各白金二百五十兩鈔四千錠錦三疋紵絲十表裏紗羅各十疋仍令戶部加支本色祿米有差 祖宗朝親親右文其隆渥如此

夷王如親王

西虜如忠義王北虜如太平王如和寧王皆待之以王號取羈縻而已獨永樂 哈密忠順王築城池賜金印復設長史紀善衛經歷以中國庶僚周安劉行常思誠充之則儼然親王矣哈密累建累廢後爲土魯番所併雖以 詔旨還王及印微弱不振終難復也

異姓追封王

國朝推劉氏白馬之約於勲戚大臣無生封王者惟贈典則有之今記於左

滁陽王郭子興以舊帥追封

揚王陳公以外大父追封徐王馬公以外父追封俱無名外高祖太王外曾祖高王俱無姓

隴西王李貞以姊夫及子文忠功追封

中山王徐達開平王常遇春岐陽王李文忠寧河王
鄧愈東甌王湯和黔寧王沐英定遠王沐晟河間王
張玉定興王張輔東平王朱能宣平王朱未以功追
封

平陰王朱勇以死難追封

寧陽王張懋定襄王朱希忠以恩舊追封以上廟像
用七旒剋皮弁及誥命用寶軸金冊寧陽定襄後以
言者追論非例見禡

又

洪武三年大封勲臣所謂生封公死封王者凡六人

其後李韓公善長馮宋公勝皆以罪不得封而封王
者湯信公和沐西平英也沐定遠晟朱宣平永已不
能無異議矣朱平陰之死敗績與江洪公同而得封
王爵至李隴西貞張寧陽懋朱定襄希忠抑又異矣
異姓封王

永樂末年也先土干來歸賜姓名金忠封忠勇王奉
朝請其祿俸僉從在公之下侯之上然累加太保太
子太保等官又在京及典兵出征非四夷封爵比也
贈三代王

洪武三年追封鄂國公遇春爲開平王十六年曹國

公文忠爲岐陽王十八年魏國公達爲中山王二十五年西平侯英爲黔寧王俱追封其三代曾祖七父爲王鄂魏曹以勲西平兼以戚也洪熙初追封東平河間亦三代王後無之

再進公號

吳元年封中書左相國李善長宣國公右相國徐達信國公時上尚爲吳王也洪武三年左丞相宣國公善長進封韓國公祿四千石右丞相信國公達進封魏國公祿五千石

再易侯號

豫章侯胡廷瑞改封臨川侯

父子易封

甲令襲封仍故號常忠武遇春封鄂國公薨子茂襲改封鄭國公茂得罪弟昇改封開國公鄧武順愈封衛國公子鎮襲改封申國公納哈出降附封海西侯子察罕襲改封瀋陽侯濮英贈金山侯子璵改封西涼侯

遙授國公

廖平章永安爲張士誠所獲不屈被囚遙封楚國公卒後改封鄭以避王封也

恩澤公

高帝最重公封下於王一等其時獨李曹公貞以尚
主由恩親侯進封然與其子文忠同爵不甚異也至
二十三年都督僉事胡顯以 皇克妃從子侍楚王
征蠻洞功甚微進封梁國公則甚異矣永樂初徐定
公增壽以 皇后弟翰欵被禍封遂世襲嘉靖初張
昌公鶴齡以 太后兄推恩郭翊公勛以督工進封
真濶異之典也然昌翊二國是流爵非世襲

襲爵公侯贈王公

襲爵公侯伯非有奇功異能沒不得追封王公侯亦

令甲也寧陽王爲英國公懋平陰王爲成國公勇定
襄王爲成國公希忠康蘄春鐸之封蘄國陳泰寧瀛
之封寧國宋西寧瑛之封鄆國吳恭順瑾之封涼國
孫會昌繼宗之封郊國李忠憲賢之封豐國蔣敏毅
琬之封涼國皆襲爵內朱陳宋吳四人皆以死事則
寧陽定襄誠爲曠典而嗣侯得之亦爲異恩矣

文臣封爵

按大明律文臣不許封公侯又云其生前出將入相
能除大患盡忠報國者同開國元勳一體封侯謚公
不拘比例謚當作贈疑誤也按稱封侯謚公又云不

拘此例則侯似可封然所謂生前云云恐亦追封也
國初自李韓公後不復見成化中欲進封王越亦以
此例而止

封公者中書左丞相韓國公李善長以開國輔政功
封

封伯者右丞相忠勤伯汪廣洋以輔政封御史中丞
誠意伯劉基以籌策封廣東左布政使東莞伯何真
以降附封何本武階已上

太祖時封階勲尚二品而何公不言階勲顧歲祿至
千五百石已在一品上矣

兵部尚書忠誠伯茹瑄以迎附封已上

太宗時封勲階皆正一品矣

兵部尚書靖遠伯王驥以平麓川封禮部尚書興濟
伯楊善華蓋殿大學士武功伯徐有貞以奪門封已
上

英宗時封

都察院左都御史威寧伯王越以破虜封已上

憲宗時封

南京兵部尚書新建伯王守仁以擒叛王封真人恭
誠伯陶仲文以修藥餌封已上

世宗時封

汪劉陶不世襲劉卒後其孫推恩封一輩至曾孫於嘉靖中復封何楊傳一代廢茹徐傳世指揮使隨革今得世襲者基驥守仁而已

嘉靖初修定策功內閣大學士楊廷和蔣冕毛紀封伯爵子孫世襲固辭而許廷和子孫世襲在京四品文職冕等五品俱不就

文臣支伯爵俸者嘉靖中真人陶仲文以祈雨少師嵩年八十加恩隆慶初少師徐階十八年考滿加恩辭萬曆中少師張居正十五年滿加恩辭按嵩之伯

爵俸定議千二百石又本色八分折色二分所以爲優若干石則在正一品下比之舊支正一品兼支尚書俸更薄矣

錄軍國重事

洪武元年李宣公善長徐信公達常鄂公遇春於階勲下帶錄軍國重事若因元之舊耳三年宣公進封韓信公進封魏改帶叅軍國事而同封李曹公文忠爲同知軍國事馮宋公勝鄧衛公愈爲同叅軍國事蓋不無少軒輊也十年信公湯和加設知軍國事頗重以後不入街

文職冒武號

國初公侯爲輔運伯爲翊運武爲宣力而文爲守正汪忠勤廣洋劉誠意基爲開國翊運守正文臣而無推誠字蓋殺其禮也茹忠誠瑋因之其後王靖遠驥號止推誠宣力楊興濟善有奉天翊衛八字然俱稱武臣雖秩隆於前三伯而文職冒武號不自覺其誤矣後徐武功有貞自爲誥券始復改正而靖遠興濟遂援以請亦得稱文臣洪武中公有光祿左柱國榮祿右柱國皆帶特進而侯止榮祿柱國伯止資善大夫護軍靖遠以後乃俱爲特進光祿大夫柱國雖伯

階已進次通侯然職典章者亦不爲不誤也

文武勲號之優

勲號在洪武者曰開國輔運在永樂者曰奉天靖難久之則曰奉天翊衛或以祖勲而封後人者曰欽承祖業其武職則曰推誠宣力文職則曰推誠守正而已惟張英公輔初以奉天靖難推誠宣力武臣爲新城侯洪熙給誥以上公故特加輔運二字正統實錄成加佐理二字共得十二字朱宣平永加佐理與徐武功有貞加奉天翊運推誠宣力守正得十字而王靖遠楊興濟因之後王威寧王新建亦因之蓋奄有

文武之美非故典也嘉靖中封常李鄧湯後四侯誠
意一伯給本身誥券只當稱欽承祖業不可言開國
也

文臣贈爵

贈公者江西行省參政姑熟郡公陶安係國初未定太子

少師榮國公姚廣孝

贈侯者知處州府太原郡侯王道同知南昌府南陽

郡侯葉琛左司郎中高陽郡侯許瑗係國初未定尚書靖

遠侯王驥與濟侯楊善新建侯王守仁俱見前

贈伯者吳王府參軍左司郎中縉雲伯胡深中書參

議西河伯毛麟臨江同知天水伯趙天麒太子太師

湯陰伯郭資少師在平伯吳中太子太保沐陽伯金

濂深麟麒皆國初未定之制

贈男者中書都事丹陽縣男孫炎中書都事當塗縣

男王愷時爵後罷初未定

公世子

令典親王子曰世子禮服視郡王郡王子曰長子禮

服視鎮國將軍公侯子應襲者授勳衛及帶刀舍人

不當言世子也惟湯信公和子輓已爲前軍都督僉

事二品矣率而贈世子又

高帝御撰中山王神道碑曰世子輝祖襲想 國初之制如此但不知品秩何如

上柱國

會典稱正一品階勳云加授贈特進光祿大夫上柱國疑止爲贈設耳李韓公徐魏公常鄂公初俱帶上柱國然階不過銀青榮祿大夫蓋因元之舊官未定也後常公物故二公俱改左柱國近夏少師言獨得上柱爲一時曠典然在隋初爲從一品勳而唐則四實不爲異也乙丑年加嚴嵩辭以人臣無上則夏公此官固駭乘之禍耳乙丑少師徐階以十五年滿加

固辭辛巳少師張居正亦以十五年滿加亦辭後卒以爲贈今按上柱國一人夏言贈上柱國一人張居

正張後追奪而言官誤以爲生前所加

左柱國

左右柱國不見會典洪武三年始封李徐二公加左柱國自李曹公而下俱右柱國文臣則絕無及者正德初劉文靖健以 顧命大臣得左柱國繼之者李文正東陽楊文忠廷和梁文康儲楊文襄一清大槩皆異典也萬曆時大學士張居正請具以九年滿加左柱共八人正德末年梁文康以次輔與楊文忠同

得左柱尤奇今少師時行以六年滿得之俱奇

洪武三年大封唯太師李韓公太傅徐魏公稱特進

光祿大夫左柱國而已常鄭公茂馮宋公勝李曹公

文忠鄧衛公愈皆以榮祿右柱國封見左之不易得

也湯信公和由中山侯進封得光祿左柱而胡梁公

顯以王親亦濫竽焉若傅頰公藍涼公之大勳亦仍

榮祿右柱而已未樂初李曹公景隆以降附加祿千

石為光祿左柱而元勳如丘淇公福朱成公能下安

南如張英公輔沐黔公晟皆榮祿右柱至洪宣中英

公以國史完始進光祿左柱成化末太師張英公懋

進光祿左柱而朱保公未封國時亦止以光祿兼右

柱耳以後如朱太師希忠之崇貴亦止特進柱國然

則左柱國亦非人臣所易當也

左柱國不兼特進

階以特進為重而勳尤以左柱國為崇特進而止柱

國者有之未有左柱國而不帶特進者也嘉靖十五

年加武定侯太師左柱國而不帶特進似不可曉萬

曆初吏部擬加少師江陵公亦如之尋辭

文臣特進

文臣非伯爵而階特進光祿大夫者亦不易得今按

無左柱國者劉文穆吉嚴分宜嵩徐文貞階帶左柱
者劉文靖李文正楊文忠楊文襄梁文康張江陵及
申少師帶上柱者夏文愍前後共十八而已

弇山堂別集卷六

弇山堂別集卷七

吳郡王世貞元美著

皇明異典述二

文臣加三公

太師太傅太保曰三公

高帝時李韓公善長爲太師而徐魏公達爲太傅常
開平遇春贈太保已後絕不輕授其重惜之意可知
仁宗始加張英公爲太師嗣後武臣得之不以爲異
嘉靖初楊少師廷和一品十二年又以辭伯爵有進
階二級詔旨特拜太傅四辭而止萬曆初張文忠

居正一加太傅三辭而止辛巳始拜命壬午張進太師十日卒今按太師二人李善長張居正太傅一人即張公二公後皆削

勲臣太師

三公雖並經邦而太師尤重非人臣所敢當以徐中山之勲德而加止太傅去韓公幾五十年而有英國公張輔嗣公張懋保國公朱永昌國公張鶴齡定國公徐光祚翊國公郭勛成國公朱希忠并韓公凡人郭加太師時尚侯爵尤爲異也

公孤真任

洪武十三年廢中書省後有上疏請設三公府俾之坐論燮理上欲從之而未定也考宣德三年勅太師英國公張輔少師吏部尚書蹇義少傅兵部尚書華蓋殿大學士楊士奇少保太子少傅戶部尚書夏原吉太子少傅工部尚書謹身殿大學士楊榮按義等勅云卿等祇事祖宗多歷年所嘉謨謹議積勛勤誠朕嗣統以來尤深贊輔夙夜在念圖善始終蓋以卿春秋高尚典繁劇優老待賢禮非攸當况師保之重寅亮爲職不煩庶政乃副倚毗可輟所務朝夕在朕左右相與討論至理共寧邦家職名俸祿悉如

舊鄉其專精神審思慮益致嘉猷用稱朕眷注老成
至意欽哉其輔勅云鄉以親以賢祗事祖宗多歷
年所忠存社稷功著國家逮朕纘承大統勤誠輔弼
元勲厚德巋然於今方當注倚之時矧居燮理之任
不煩以政乃理攸宜可輟中軍都督府事職名俸祿
悉如舊朝夕在朕左右相與究論軍國重務共安家
邦鄉其專精神明道德益弘啟沃之功用臻治平之
効蓋真領公孤之職也十年上崩蹇夏後先卒而
二楊還領閣務尋復爲虛銜蓋迄今云又未樂中姚
廣孝以立東宮自僧錄左善世進太子少師而無他

兼職又有勅云鄉資性篤實學行老成事朕藩邸積
有年歲朕靖難之初鄉侍左右謨謀弼贊裨益良多
今建儲嗣簡求良輔以鄉舊人特授太子少師夫太
子天下之本也必賴啟迪良正輔成德器仰尚勉盡
厥職副朕眷倚之重欽哉以此考之不兼它官不領
他職亦真任也

四夷三公

未樂中也先土干來歸賜名金忠洪熙元年加太子
太保宣德六年加太保俱二俸兼支又未樂賜阿魯
台太師中書右丞相和寧王誥命然亦因故號而稱

之耳

三孤兼東宮卑秩

按師保兼東宮官或帶本秩如少師兼太子太師之類或以小兼大如少保兼太子太傅之類無大兼小者唯宣德初夏忠靖原吉以少保仍兼太子少傅欲優以二俸故也嘉靖初楊文襄一清以少師兼太子太傅亦官制一變也席文襄公書嘗言宜釐正不報公孤自相兼

嘉靖中京山侯崔元巳加大傅左都督陸炳巳加大保二公俱兼太子太傅太保正一品階矣後以聖誕

前後元加少師炳加少傅元後同大學士嵩辭得免炳至終身稱太保兼少傅上時亦不安于心有御札云以公兼孤亦可

公兼三孤及侯兼東宮三少

國公自加三公外有東宮三太而無三孤萬曆英國公張溶加少保再加少傅侯伯兼公孤外其於東宮有三太而無三少天順中廣寧侯劉安加兼太子少傅隆慶中恭順侯吳繼爵加兼太子少保若洪武初李韓公兼太子少師徐信公兼太子少傅常鄂公太子少保其時官制亦未定也

三少相兼

嘉靖中真人禮部尚書陶仲文兼少師少傅少保古今所未有

三品兼三少

東宮三少以上舊制惟尚書左右都御史得兼之洪熙初推恩大學士楊士奇以禮部左侍郎加少保楊榮以太常卿加太子少傅金幼孜以戶部右侍郎加太子少保無何俱進尚書景泰間備署宮官且以易儲故推恩吏部左侍郎兼翰林院學士江淵禮部左侍郎兼學士王一寧戶部左侍郎兼學士蕭鎡兼太

子少師吏部左侍郎俞山太子少傅兵部右侍郎俞綱都察院左副都御史羅通太理卿蕭維禎通政使李錫俱太子少保前後所無

孤卿兼宮官

洪熙中少師蹇義少傅楊士奇少保黃淮例不兼宮臣其自東宮三太三少而進三孤者則削其舊銜如太子少傅楊榮太子太傅胡濙太子太保王直進少傅是也故景泰以前當以孤卿兼宮秩爲異少保兼太子少傅戶部尚書夏原吉僅一人

孤卿不兼宮官

自景泰備東宮三太而三孤俱有兩職然成化初猶有不兼者曰少保李賢彭時彭公沒絕響矣故成化而後當以不兼官秩爲異曰少保禮部尚書文淵閣大學士張璁亦僅一人

南部三孤

南京大臣以三孤兼者獨少保參贊機務南京戶部尚書黃福一人而已若太子太保則有四人兵部喬宇秦金吏部用賓戶部周經

節鎮三孤

弘治王襄敏越總制陝西三邊以少保兼太子太

嘉靖楊文襄一清總制陝西三邊以少傅兼太子太傅正德陳金總督兩廣胡宗憲總督浙直江西福建俱以少保兼太子太保凡四人若太子太保則景泰兩廣王翱成化宣大王越俞子俊正德四川洪鍾彭澤嘉靖三邊王憲王瓊王以旂劉天和征倭趙文華隆慶宣大王崇古萬曆宣大方逢時張佳胤鄭洛尚書一品

建文初特崇加六部尚書皆正一品於是吏部尚書張統戶部尚書王鈍禮部尚書陳迪鄭賜兵部尚書齊泰茹瑄鐵鉉刑部尚書侯泰暴昭工部尚書嚴震

直皆階特進榮祿大夫每部增設侍中正二品

四輔官分四時

高皇帝設四輔官均職四季以上中下三旬人各司之驗兩陽春三月李佑司皆中旬十日龔敷司皆下旬十日夏三月杜敷司皆上旬十日吳源司皆中旬十日趙民望司皆下旬十日秋冬亦如之各兼太子賓客班列公侯都督之次尚書之上又有四輔游東苑倡和詩不載

一佩九印

太宗初幸北京官不必備或以事譴有一官署二三印者惟夏忠靖原吉兼掌九卿印各曹俱於朝房取裁爲一時盛事云

六卿兩銜

洪武二十四年太子少保詹徽以吏部尚書正兼都察院左都御史嘉靖十四年太子太保汪鋐以吏部尚書正兼兵部尚書二公俱綰二綬更日治事詹公同在洪武初以吏部尚書兼翰林院學士承旨亦兩綬二職以其俱三品也故附記之

吏部尚書掌別部

正德初起太子太傅吏部尚書屠公瀟以舊銜兼都

察院左都御史掌院事隆慶末起少傅兼太子太傅
吏部尚書楊公博以舊銜掌兵部事然不預本部職
任十五年起吏部尚書嚴清掌兵部未上

別部尚書署吏兵部

永樂以前無論已宣德間戶部尚書帥達署吏部終
身輟本部事工部尚書吳中署吏部不輟本部事嘉
靖間刑部尚書鄭曉署兵部輟本萬曆間兵部尚書
方逢時署吏部不輟本俱以候尚書未至也又刑部
尚書嚴清署吏部三日推吏

六鄉外署

建文中兵部尚書茹瑞署河南布政司刑部尚書暴
昭署平燕布政司在真永樂中戶部尚書郭資署北
平布政司工部尚書黃福兵部尚書陳洽總署交趾
布按二司刑部尚書維僉掌真定府刑部左侍郎楊
勉署山東布政司

吏部尚書外遷

洪武十三年以前吏部尚書遷行省參政者皆為遷
也蓋尚書三品而參政從二品耳又有吏部尚書王
興福為西安知府周時中為鎮江知府陳修為濟南
知府李仁為青州知府陳敬為禮部員外郎崔善為

宣化典史

吏部尚書改別部

吏部自建文而後益重矣其改兵部者茹忠誠瑞南
本部者崔莊敏恭服以丁憂南禮部者耿文恪裕南兵
部者劉機服以丁憂改兵部總督者王恭襄瓊起以戊戌改
刑書者李康惠承勛未上

尚書兼九列

王驥程信以兵部尚書兼大理寺卿石璞趙榮以工
部王來以南京工部兼亦如之蓋皆用軍功也按理
官非若宮秩可兼又於品為三無足榮者蓋二俸並
支優以歲祿耳自程後絕不復有此加又洪熙初禮
部尚書呂震為太常寺卿則兼事與祿也

南兼北銜

正德初王公軾以南大司徒兼北院副都總師征蜀
嘉靖中王公守仁以南大司馬兼北院左都討岑猛
張公經以南大司馬兼北院右都平倭至王公用賓
以南太宰仍兼翰院學士蓋優禮儒臣之典也

北銜理南務

嘉靖中李默王材萬曆中屠羲英俱以太常寺卿掌
南京國子監祭酒事萬曆初萬士和以禮左侍管南

禮右侍事尋以左侍掌國子監翁大立以兵左侍前
後管南吏刑二部右侍事此皆以北銜理南務也

戶部事祿之異

宣德中夏忠靖原吉爲少保太子少傅戶部尚書然
不治部事而兼支尚書俸郭忠襄資以太子太師起
掌部事然不帶尚書銜一時事也

一部二尚書

洪武初制每一部二尚書如吏部詹同李守道戶部
李泰周肅同日命下後雖革亦往七有之吏部宣德
蹇義郭進景泰王直何文淵又王直王翱戶部永樂

郁新夏原吉宣德夏原吉郭資禮部永樂呂震趙玃
景泰胡濙楊寧兵部建文茹瑞齊泰永樂金忠方賓
正統王驥徐晞又徐晞鄺埜景泰于謙儀銘又于謙
石璞嘉靖張瓚樊繼祖工部永樂趙玃宋禮又吳中
趙玃宣德吳中李友直嘉靖林廷楫甘爲霖又溫仁
和甘爲霖歐陽必進又雷禮萬曆楊兆何起鳴石星
曾同亨兩左都景泰陳鎰王文正德陳金玉璟三左
都景泰陳鎰王文王翱

叅贊團營非兵部

叅贊守備機務非南京兵部者戶部尚書黃福張鳳

吏部尚書崔恭都察院右都御史張純王恕南兵部
而非尚書者右侍郎徐琦

團營非兵部者都察院左都御史王越馬文升右都
御史鄭曉右僉都御史李遂若王廷相汪鋹雖以掌
院兼之然帶兵部尚書銜

蘇松江浙人戶部帶銜

高皇帝制直隸蘇松二郡人不得官戶部未樂中

皇太子監國請以江西人給事中王高爲戶部侍郎
不許正統末吉水周忱拜戶部尚書僅數日而改工
部以後雖巡撫銜亦避之惟內閣學士不論如永嘉

黃公淮廬陵陳公循淳安商公輅長洲王公鏊餘姚
謝公遷慈谿袁公熾吾郡申公時行鄞縣余公有丁
是也又吾郡滕思勉顧禮衢州徐恢皆實拜戶部蓋
洪武中未定之制也

尊官掌九列

成化末三品以下九卿多以尊官掌之通政司張文
質太常寺劉崧鴻臚寺施純俱太子少保禮部尚書
大理寺杜銘工部尚書光祿寺艾福國子監丘濬欽
天監康永韶皆禮部侍郎大醫院蔣宗武通政使上
林苑監李孜省左通政蓋多以傳奉得之故也然未

有如景泰時楊善之異善以左右都御史加太子太保俱仍掌鴻臚寺

內閣次序互異

內閣五品時不過文淵翰林諸學士庶子諭德中允爲序耳其諸殿次第自正統時定兼部銜次第自天順始定如楊榮以太子少傅謹身位少保黃淮武英下陳山無兼官以謹身位少保黃淮太子少保金幼孜武英下少保黃淮太子少保金幼孜以戶部尚書位少傅兵部楊士奇下金幼孜又以戶部楊溥無兼官以禮部位工部楊榮下王文以少保吏部位戶部

陳循工部高穀少保太子太傅下皆取所兼保傅爲次序也張瑛以禮部華蓋殿位戶部謹身陳山下此則以部分爲次序也

掌文淵閣

閣臣入閣止云直文淵及辦事而已惟徐有貞以武功伯兼華蓋殿學勅掌文淵閣事遂以掌文淵閣入銜武功敗李賢以右侍郎復拜吏書兼學士奉旨亦掌文淵閣然不入銜

閣臣不預事

宣德初謹身殿大學士陳山改專教內璫華蓋殿大

學士張瑛出理南部俱不得預閣事而吏部蹇義戶部夏原吉俱輟部務以師保入備顧問計議朝政即家條旨草制勅然不入內閣亦一時異事也
大學士非內閣

洪武中華蓋等殿大學士劉仲質邵質余思誠鮑恂余銓張長年吳伯宗朱善宋訥吳沈其時原無內閣也若洪熙時文華殿大學士權謹及陳山教內豎後皆非內閣臣矣

內閣兼掌部院

正德初大學士焦芳入閣後又專銓柄乞於闈人瑾

兼掌吏部

數日罷

嘉靖中大學士張璠兼掌都察院方

獻夫兼長吏部

不久罷

嚴嵩以

上眷注及徐公階以

候尚書德俱兼掌禮部

俱半歲罷

李公本出掌吏部

旬日罷

乙丑大學士嚴公訥由吏部入以候尚書朴仍暫掌部事隆慶庚午大學士高公拱起掌吏部趙公貞吉出兼掌都察院俱免奏事承旨內璉奉勅肅清百僚本事畢恩獎加少保武英殿學拱綰綬歷年兩司內外考察至屈首揆尚握銓柄出而啟事入而條旨尤爲異聞

內閣司考察

嘉靖三十五年吏部尚書李默得罪內閣大學士李公本掌部事分別尚書以下九卿大小巡撫都御史作三等其上中等擬留下等取 上裁復考察科道官應留應去者以聞天順元年特命大學士徐有貞攷布政黃輿高寅王亮等知府白仲賢萬安等俱冠帶閒住

南部入閣

內閣由南部入者凡三人楊文忠廷和以南京戶部梁文康儲張文隱治以南京吏部俱尚書入

內閣出爲六卿

景泰六年太子少師吏部左侍郎兼學士江淵爲工部尚書掌部事嘉靖四年少傅大學士楊一清起改兵部尚書左都御史總督三邊十八年禮部尚書大學士翟鑾起改兵部尚書右都御史閱九邊充行邊使

內閣出理南部

宣德四年華蓋殿大學士張瑛以原官掌南京禮部其官稱禮部尚書蓋是時北爲行在故也

致仕丁憂部臣入內閣

萬曆十年致仕太子太保禮部尚書潘晟起家武英

殿大學士十二年給假丁憂禮部右侍郎兼翰林院
侍讀學士王錫爵起家禮部尚書文淵閣大學士
祖宗朝所未有也

閣臣外任

永樂中解學士縉爲交趾叅議胡侍讀儼爲國子祭
酒天順中岳修撰正爲欽州同知後復官止於翰林
供事再出知興化府徐武功有貞爲廣東李尚書賢
爲福建許禮侍彬爲陝西俱叅政賢尋復入爲吏部
右侍郎又宣德中太常卿兼學士楊溥景泰中翰林
院侍讀彭時俱以內閣丁憂服除守本官後二公俱

再入內閣

輔宰臣督工

閣臣於興造工役規畫則有之未有躬履其事者若
吏禮二部臣則絕不之及矣惟嘉靖九年建南北郊
大工少傅大學士張孚敬知建造少保大學士桂萼
大學士翟鑾同知建造十四年少師大學士孚敬少
保大學士李時知建造太子太保吏部尚書汪鉉少
保禮部尚書夏言同知建造於工部爲侵官於閣臣
爲失職

內閣公侯審錄

今三法司囚犯每五年執審奏請矜疑辨問及減等發落自正統初遣司禮監太監金英始遂爲定制必以巨璫之首爲之張傘蓋列騶騎既至大理寺則擐高坐南向尚書都御史皆傍坐而御史郎中以下官引囚廷審殊不爲雅惟嘉靖十六年三月不用中官特以勲臣勛及二輔理之第勛倚貴自用所釋減幾大半圉圍爲空 皇帝勅諭太師兼太子太師武定侯郭勛少傅兼太子太師吏部尚書華蓋殿大學士李時少傅兼太子太師禮部尚書武英殿大學士夏言朕惟刑獄重事民命所關近來法官多不習律比

任情出入以致冤濫滋甚及今會審應辨問者又拘執成案不與開釋朕每念及此惻然軫懷茲特命卿等會同三法司官將見監死罪重囚逐一面加勘鞫務得真情中間事有虧枉情可矜疑者奏來定奪朕以卿等勲輔重臣故茲簡托卿等宜仰體朕心殫誠竭慮往恭厥事卿等其欽哉欽哉

內閣不由翰林

內閣不由翰林凡八人王毅愍文以左都御史楊文襄一清劉鈞州宇許文簡讚以吏部尚書薛文清瑄以大理寺卿俞綱以兵部右侍郎李文達賢以吏部

侍郎曹元以兵部尚書

內許以公曾為編修然以御史改

其初不由翰林而後改翰林入閣者解縉初為御史

黃淮初為中書舍人楊士奇初為兵府審理副胡儼

初為桐城知縣金幼孜初為給事中陳山張英初為

教官給事中袁宗臯初為長史桂萼初為刑部主事

張孚敬初為南刑部主事方獻夫初為吏部員外郎

夏言初為行人給事中

王毅愍薛文清外亦有異者如江淵以刑部右侍郎

尹直以兵部左侍郎徐有貞以都察院左副都御史

許彬以太常卿雖常為翰林而所進階序亦未相應

殿閣二街

景泰中修寰宇通志陳少保循以華蓋殿大學士兼

文淵閣大學士高少保穀王少保文俱以謹身殿大

學士兼東閣大學士亦一時異制也

學士二街

弘文館學士兼翰林院侍讀學士危素文淵閣大學

士兼翰林院學士胡廣楊榮金幼孜左春坊大學士

兼翰林院學士解縉胡廣商輅左春坊大學士兼侍

讀學士曾棨楊廷和彭時右春坊大學士兼侍讀學

士王英劉儼呂原楊公以弘治末年加坊學不設五

十年矣自楊公後八十餘年絕不復設

內閣首臣復居次

永樂四年解縉罷黃文簡准以右坊學居首二歲而
度子胡文穆以學士兼左坊准遂居次楊文敏榮永
樂十六年以文淵閣學居首二十二年楊文貞爲華
蓋榮遂以謹身居次梁敷儲正德九年居首累遷至
華蓋十三年故相楊文忠復入銜位同而入閣在前
儲遂居次嘉靖二十三年嚴分宜居首累遷至謹身
二十五年夏文愍以華蓋復入嵩遂居次

內閣兼官之異

大學士五品也然多以尚書兼之洪熙元年楊文貞
以禮左侍兼華蓋金文靖以戶右侍兼武英宣德元
年陳山以戶左侍兼謹身張瑛以禮左侍兼華蓋後
絕無之至嘉靖中李公本以吏右侍兼東閣隆慶初
江陵張公居正以吏左侍兼文淵閣萬曆中吾吳申
公時行大同王公家屏以吏左侍兼東閣俱大學士
謹身殿大學士以太常卿兼者楊榮武英殿大學士
以通政使兼者黃淮蓋加官也學士以刑部右侍郎
兼者江淵以國子祭酒兼者蕭鑑以都察院左副都
御史兼者徐有貞由兼官進故也江蕭徐俱不數日

而改

學士兼官之異

正德中學士靳貴左兼光祿寺卿天順復辟凡景泰中東宮官左右春坊大學士呂原倪謙左庶子劉定之改通政司左右叅議左右庶子林文李紹俱改尚寶司卿仍兼講讀諭德錢溥洗馬柯潛俱改尚寶司少卿左右中允黃諫萬安李恭改尚寶司丞仍兼史官亦時制之一變也

洪武孔克表王傑以翰林修撰兼編修天順孔公恂以詹事府少詹事兼諭德近乎疊牀架屋矣

閣臣出使

內閣若楊文襄之督三邊翟文懿之巡九鎮皆起自家俱改兼部職楊文敏三使寧夏甘肅與寧遠西寧謀軍務其時閣體未重至景泰中王毅愍文勘南直隸事情高文義毅以祭告江海二公皆兼賑濟江少師淵督察四川軍情理糧餉則事體異矣弘治末闕里告完李文正東陽以次輔致祭兼撰碑蓋重其事也

閣臣扈從

永樂北征凡四其前二則胡文穆廣以文淵閣學與

楊文敏榮金文靖幼孜扈從其後二則楊金二公俱以文淵閣學扈從宣德征漢庶人一楊少傅士奇楊宮傅榮金宮保幼孜楊學士溥從巡邊二其一則三楊與金其一獨三楊從正統北征曹學士昂張學士益從正德征寧庶人梁文康儲蔣文定冕從嘉靖南幸承天夏文愍言從唯征漢庶人有勅與蹇少師夏少師同叅預機務

贈官內閣吏部銜

大臣歿有贈官獨內閣大學士及吏部尚書不以加贈如梁武之於朱昇宋神宗之於韓琦非破例不可

惟景泰中贈侍郎曹昂嘉靖初贈左長史張景明俱文淵閣大學士贈左都御史宋景為太子少保吏部

尚書

賜贈三官景贈二官
尤本朝所無之典

各部尚書兼學士

六部尚書非內閣而帶學士者惟禮部有之然亦自桂方二文襄起蓋上以議禮褒寵之且示為入相之地耳後遂為定制今按以吏部尚書帶者桂公萼方公獻夫李公默郭公朴嚴公訥以戶部尚書帶者李公廷相以工部尚書帶者溫公仁和董公份自嘉靖丙戌後禮部尚書不兼學士銜者惟萬公士和及

今徐公學謨而已

二尚書任國子

洪武中起致仕刑部尚書李敬爲國子祭酒致仕試吏部尚書劉崧爲司業今人但知劉而不知李也劉居官月餘卒李後坐事抵罪成化初亦以此例起禮部左侍郎李紹少詹事兼學士柯潛潛以喪服辭與李俱不及任而卒

弇山堂別集卷七

弇山堂別集卷八

吳郡王世貞元美著

皇明異典述三

文臣監修 國史

國朝修實錄例以內閣大臣總裁而元勛上公一人監修獨

高廟實錄初以曹國公李景隆監修戶部尚書夏原吉副之中用太子少師姚廣孝及夏公至嘉靖中修睿宗實錄復用禮部尚書席公書吏部尚書廖公紀蓋特典也

文臣知經筵

故事勛臣一人知經筵內閣臣俱同知經筵後至李文達賢始以內閣首臣與勛臣俱知經筵而劉文穆劉文靖楊文忠徐文貞張江陵及今申少師俱因之矣夏貴溪嚴分宜雖極貴寵而上不御經筵遂成闕事

勛臣從祀孔廟

萬曆中詔以新建伯王守仁從祀孔廟時布衣胡居仁亦與焉真非常之遇也

文臣配享

高廟配享不及文臣洪熙中以太子少師贈少師姚恭靖公廣孝配 文皇帝嘉靖中以御史中丞贈太師劉文成公基配 高皇帝姚至嘉靖中華賜祀於大興隆寺

藉田孤鄉五推

天子耕藉田三公五推九卿九推今例以公侯兼三太者充之張江陵以少師與五推蓋特恩以爲加太傅張本也

文職世文蔭

嘉靖元年楊太師廷和蔣少傅冕毛少保紀以辭伯

爵費少保宏以辭蔭錦衣指揮使改蔭錦衣指揮千戶等官復固辭以兵部尚書彭澤言蔭楊公四品在京文職蔣毛五品費七品皆世襲固辭復不許然四公迄無拜

侍郎非本曹

嘉靖中董吳興份以工部尚書管吏部左侍郎事正德中儲文懿瑾以戶部左侍郎起管右侍郎事又嘉靖初兵部左侍郎陶諧黎爽俱管右侍郎事萬曆中右都御史吳允張佳胤管兵部左侍郎事又兵部左侍郎王遴起管右侍郎事則以左侍無見缺故也萬

曆中萬宜興士和以禮部左侍郎管南京禮部右侍郎事翁餘姚大立以兵部左侍郎管南京刑部右侍郎事尋以原官管南吏部右侍郎事胡永昌執禮以兵部左侍郎管南京兵部右侍郎事則以南部無左侍故也按儲文懿瑾後復以戶部左侍郎起南京左嘉靖初胡端敏世寧以兵左侍告南改吏左非謂南必無左有左不設右有右不設左乃故事也吳興一轉尤爲異典

巡撫非部院

未樂間大理寺卿胡際叅政葉春同撫直隸太常

寺少卿周訥撫湖廣大理寺丞郭瑄撫廣東大理寺丞孫時撫山西通政司叅議朱侃撫廣西正統間大理寺卿蔡錫撫湖廣大理少卿張驥撫浙江大理寺丞孔公恂撫直隸景泰初大理寺丞王振撫貴州大理寺卿孔文英鎮紫荊通政司叅議鄒文學鎮保定大理寺丞羅綺贊理甘肅軍務李奎撫保定成化間大理少卿吳道宏撫鄖陽又正統巡撫山西河南侍郎于謙降大理寺少卿嘉靖巡撫順天僉都御史張陞降寺丞俱仍巡撫

大將軍

國朝將軍掛印者事權甚重可以生殺人而大將軍爲尤重洪武元年以徐中山達爲征虜大將軍至十七年卒雖以常開平李岐陽之才且貴重然不過副將軍而其他有征南征北征西征戎之專寄亦不過將軍而已傅穎公之平雲南鎮北邊張英公之三下交陞統衆多者至八十萬少亦三十萬然皆不得掛大將軍印也余所知者十六人

征虜大將軍徐達馮勝藍玉

洪武 丘福

永樂 平虜大將軍

李景隆

建文

柳溥

景泰

朱永

成化

朱暉

正德

杭雄仇鸞

嘉靖

俱禦

鎮朔大將軍薛祿譚廣

宣德楊洪石亨景泰俱征邊

按譚杭以都督得之尤為異與余嘗見仇鸞銜位云

平虜大將軍總督京營戎政統領各路人馬太傅太

子太師咸寧侯可為寒心然未幾死事敗僂及妻子

正德中有稱威武大將軍朱壽者上也而許恭則

為副將軍迨南狩上自稱總督軍務而太監張永

與彬曰提督贊畫機密軍務張忠及泰曰提督軍務

一時各邊稱總督者俱改總制及提督

世廟幸承天以太師翊國公郭勛為都護大將軍太

子太傅成國公朱希忠為副將軍

掛兩將軍印

永樂中征南將軍沐晟征蠻將軍韓觀先後掛征夷

副將軍印嘉靖中征蠻將軍柳珣亦掛征夷副將軍

印俱有安南之師故也

副七將軍

洪武四年徐魏公達北討李曹公文忠馮宋公勝為

左右副將軍鄧衛公愈湯中山和為左右副七將軍

按唐諸鎮征黃巢四面行營各設都統而王晉公鐸

以上相臨之為都七統事相反而相類

外任下遷翰林

外任左遷而得翰林者洪武中時有之若永樂庚寅
許州知州潘文奎以事當降爲有文學改左春坊司
直郎乙未湖廣按察僉事言蘄州同知桂宗儒柔懦
當黜以任淺送都察院問刑三載改翰林院修撰宣
德丙午吏部言四川按察使陳璉不諳憲法改通政
使掌國子監祭酒因謫而遷清近誠爲異事壬子大
學士楊士奇等言交趾南靈州革任知州黎恬有文
學改右春坊右諭德又山東左叅政俞士吉考滿升
詹事府詹事亦可謂非望之典最後如雲南布政使
陳文之入爲詹事浙江布政使李默之入爲太常寺

鄉掌南京國子監祭酒事皆視若登仙矣

翰林兼諫官

洪武中夏公原吉范公顯祖以太子賓客兼治書侍
御史永樂丁未李公準以太子賓客兼吏科都給事
中嘉靖庚戌趙公貞吉以左春坊左諭德兼河南道
御史宣諭行營己丑夏公言以翰林院侍講學士兼
吏科都給事中李以三品兼七品尤異 國初治書
侍御史階正四品蓋今僉都御史官也

翰林改給事中

正統中大學士金幼孜翰林檢討達改給事中成

化中翰林檢討李昊改南京禮科給事中昊忻王教授王薨故也

翰林改御史

洪武中翰林院編修馬亮任敬王璉王輝陳敏張惟洪熙元年翰林院侍講李時勉羅汝敬俱改監察御史仍限李羅一日言一事凡三日而下獄正統己巳徐公理以翰林院侍讀改浙江道御史募兵彰德楊公鼎以右春坊右中允改河南道御史募兵兗州檢討王玉改江西道御史募兵濟南俱事完復故官

翰林改教授

未樂乙未進士第二人李貞第三人陳景著俱以翰林院編修九年滿當遷改鄉官便養貞得高州府景著得福州府俱教授遂以此官終其身景著及第時僅十八尤可惜也又有錢唐王羽者繇太常少卿請便養亦得杭州教授正德中援此例以授興化養親御史陳茂烈固辭

狀元謫任

狀元授官以後謫爲他官者羅倫舒芬俱自修撰謫市舶司副提舉呂柟自修撰謫解州判官張昇自左庶子謫工部員外郎俱以言事陳謹自修撰謫廣州

府推官以公誤范應期以修撰謫南京太理寺評事
以被論

進士徑授編檢

洪武十八年乙丑授進士馬京等爲編修吳文爲檢
討建文庚辰進士吳溥楊榮楊溥俱爲編修蓋官制
未定也若正統己未進士錢溥教內使徑授檢討正
德三年徑授二甲第一人焦黃中三甲第一人胡纘
宗爲檢討蓋中人瑾變亂成法且欲私其門客及鄉
人故也

首甲不授翰林

洪武四年初開科狀元吳伯宗授禮部員外郎時正六品
第二第三人郭玗吳公達俱吏部主事從六品而會元
俞友仁中三甲爲縣丞蓋官制未定也丁丑狀元陳
郊第三人劉鏗戍謫補鴻臚寺司賓署丞尹昌隆授
禮部主事以人言考官私南人故也嘉靖壬辰第二
人孔天胤授陝西按察僉事以王親故也

給事御史互改

洪武中給事中宋善萬徵彭通王惟言王晰改監察
御史李爌以御史改工科給事中兼齊王府錄事若
未樂江西道御史汪俊民改刑科給事中山東道御

史文郁改工科給事中吏科右給事中羅亨信工科
給事中周岐正統給事中朱良暹李運俱改監察御
史又給事中金達王庾暫改御史募兵正德兵科都
給事中王翊刑科給事中張禴工科都給事中段豸
俱改御史查盤凡五六見若王肅敏廷相以庶吉士
授兵科給事中降亳州判官陸高淳知縣入爲監察
御史邇來徐貞明以給事中謫按察照磨陸推官兵
部主事尚寶司丞再以尚寶卿兼御史治水利尤異
布衣總裁 國史
永樂 詔重修

高廟實錄布衣陳濟與學士解縉等爲總裁而禮部
尚書李至剛及講讀以下僅爲纂修官

布衣考試

洪武四年京畿試前元貢士鮑恂與學士宋濂等同
爲考試官

三布衣優禮

國朝優禮處士與處士所以自處者毋過於陳靜誠
遇吳康齋與弼武學士周文而已陳在

高帝初應聘與叅帷幄大計再授翰林院學士辭授
禮部侍郎尚書以至尚書左丞又辭竟以處士卒遣

中官諭祭官爲賻葬有子枋以遇故特擢累官至尚書武在 文廟初以藩邸講讀之舊驛召至京賜藤衣銀帶鞍馬以爲翰林院侍講學士固辭聽以學士致仕賜勅及白金文幣酒餼馳驛歸吳在 英廟時遣行人齎勅及金幣驛召引見授左春坊左諭德賜宴文華殿內閣學士李賢待再賜金幣羊酒三辭俱溫音慰畱最後賜勅及銀幣給月米遣行人護歸其初聘勅曰朕承 祖宗求賢圖治亦有年矣求惟勞於求賢然後成無爲之治樂於忘勢乃能致難進之賢聞爾與弼潛心經史博洽古今蘊經國之遠猷抱

致君之宏畧爾乃嘉遜立園不求聞達朕眷懷高詭思訪高賢渴望來儀以資啟沃今特遣行人曹隆往詣所居徵爾赴闕仍賜禮幣以表至懷爾其惠然就道以副朕翹待之意 賜歸勅曰朕惟自古英君誼辟莫不好求賢士以臻治理故服位以來深思先務莫急於此聞爾與弼懷材抱道嘉遜林泉特遣行人齎捧書幣造廬徵聘爾乃惠然肯來深慰朕懷欲煩輔導東宮特授春坊諭德爾以衰老固辭朕堅意不允畱之數月病勢不已乃知本心非不欲仕第以不能供職故耳於是特允所辭且以嘉猷勗朕足見忠

愛之誠仍遣行人送還故里賜以銀幣用表至懷復
命有司月給米二石以資供膳爾其優游桑梓安身
樂道以度遐齡倘精力未衰尚其無忘纂述以繼前
賢輔教垂世之意其初授官賜銀幣辭疏 旨曰朝
廷久聞高義特用徵聘今惠然遠來朕深嘉悅然幣
以將誠官以命德禮非過也不允所辭面見諭曰重
卿學行特授官僚煩輔太子再辭疏 旨曰朕知乃
心不干仕進故不煩以冗務特處以宮僚之職不必
再辭三疏辭 旨曰固辭雖得難進之義揆之中道
無乃過乎欲觀秘書可勉就職觀此二勅三旨一諭

雖內閣輔臣其優禮遠不能過也

編修主會試

洪武戊辰國史編修蘇伯衡李叔荆主會試

編修主鄉試

永樂癸未編修王達成子檢討王洪甲午編修周述
正統丁卯檢討錢溥成化乙酉編修彭華俱主應天
試

司直修撰主會試

永樂己丑左司直郎徐善述乙未翰林院修撰梁潛
王洪景泰辛未修撰林文主會試

待詔典籍紀善主會試

洪武乙丑翰林院待詔朱善前翰林院典籍聶鉉丁丑吉府紀善白信蹈主會試

致仕官主試

洪武乙丑命前翰林院典籍聶鉉主考會試宣德癸丑前少保戶部尚書武英殿大學士黃淮主考會試聶待選吏部黃以謝恩適至京故也然聶以卑官得之其同試乃有講讀以上者尤爲奇矣

非翰林官主試

洪武三年主鄉試者御史中丞劉基治書侍御史秦

裕伯丁丑主會試者吉府紀善白信蹈革除中太常寺少卿高巽志主巳卯庚辰鄉會試

同考官尊於主考

洪武丁丑紀善白信蹈主會試而同考則侍讀張信侍講戴彛正德丙辰侍講學士陳循主會試而同考則太常少卿魏驥景泰辛未修撰林文主會試而同考則侍講劉儼廣東叅政羅宗本

三伯讀卷

廷試讀卷官當以內閣及九卿詹事翰林學士爲之惟天順丁丑徐有貞以武功伯掌內閣王驥以靖遠

伯掌兵部楊善以興濟伯掌鴻臚寺讀卷居諸公首亦時制之變也成化中王越以威寧伯兼宮保掌都察院亦預讀

異途官讀卷

又正統中左都御史楊善守以城生員戶部左侍郎掌光祿寺事柰亨以吏員太常少卿程南雲以習字生讀卷尤為奇事亨序列內閣戶部右侍郎兼學士陳循上

特賜出身

宋制大臣或有不由科第者特賜於某人榜出身或

用累舉息賜第 國朝無之唯永樂間曲阜孔諤以舉人至京中副榜第一人諤宣聖後 皇太子召見特賜進士出身授左春坊左中允侍講讀

鄉試不第而特許會試者景泰中陳瑛王倫也太學士

文子有疏會試不第而特賜廷試者洪武中韓克忠等一

榜進士也會試不第免廷試特賜進士出身者孔諤

也一云諤超授中允未賜進士出身後文皇帝改監察御史

贈進士

天順七年貢院災會試舉人死於火者九十人事聞俱贈進士出身

一歲兩狀元

洪武丁丑廷試賜陳郊劉鏐尹昌隆及第後以舉人訴覆試復取韓克忠王恕焦勝及第九二榜兩狀元而二公官俱不顯

連歲狀元

未樂辛卯如廷試寄監中式舉人陳璲等賜蕭時中苗衷黃賜及第明年復廷試中式舉人林誌等賜馬鐸林誌王鈺及第連歲二狀元而皆不顯

會試四主考

天順癸未禮部左侍郎學士陳文尚寶少卿兼修撰

柯潛為考試官貢院災以次年改太常少卿學士彭時侍讀學士錢溥

丞相知貢舉

洪武三年應天鄉試特進右丞相汪廣洋左丞相胡惟庸知貢舉御史中丞劉基治書侍御史秦裕伯主試同考則侍讀學士詹同弘文館學士睢稼起居注樂韶鳳尚寶丞吳潛國史編修宋濂四年仍鄉試主試兵部尚書吳琳國子監司業宋濂尋會試知貢舉仍廣洋惟庸又設主文官為禮部尚書陶凱前翰林侍講學士潘廷堅考試翰林侍讀學士詹同國子監

司業宋濂等

知貢舉官讀卷

禮部尚書知貢舉不得爲讀卷官唯宋濂中特 詔
尚書呂震嘉靖中特 詔尚書嚴嵩讀卷皆異數也
典史中會試

曹文襄爲以太和典史運糧至京乞會試得第二人
廷試復爲第一人十年遂登相位後有刑部吏南
昱松陵驛丞鄭溫然位不甚顯考蘇州志常熟黃鉞
叔揚亦以典史中會試

朱書黃榜

未樂甲辰

上臨軒策士初以孫曰恭爲第一邢寬爲第二既而
曰孫暴不如邢寬遂擢寬第一曰恭第三仍朱書黃
榜一時以爲盛事

同考試官作試錄序

洪武三年京畿鄉試錄序出於國史院編修宋濂四
年京畿鄉試錄序復出於濂俱國子司業是秋會試
錄序復出於濂俱同考試官最後者蓋濂以文學見
重故耳嘉靖甲辰主考禮部尚書學士張潮卒於試
院同考翰林修撰茅瓚爲後序甲子應天主考中允

孫世芳卒於試院同考吏部蔡國珍爲後序
一歲兩考庶吉士

永樂甲申擇二甲文學優長者楊相等五十一名及
善書湯沅等十人俱爲翰林庶吉士進學五月擢庶
吉士杜欽王惟正節慶爲戶科給事中周玉羅亨信
張侗爲工科給事中明年正月始復選楊相劉子欽
彭汝噐王英王直余鼎章敬王訓柴廣敬王道熊直
陳敬宗沈升洪順章朴俞學夔羅汝敬盧翰湯沅李
時勉段民悅吳紳楊勉及首甲修撰曾棨編修周述
周孟簡二十六人於文淵閣肄業所謂二十八宿者

而周忱陳請與馬司禮監月給筆墨紙光祿寺日給
酒饌禮部月給膏燭工部人給第舍按今人但知二
十八人不知其先取六十一人也宣德癸丑選年少
質美者尹昌黃瓚趙智陳雲傅綱黃回六人爲庶吉
士令王直教習十一月復選徐理賴世隆吳節李紹
姜洪虞瑛潘洪王玉陳金劉實鄭建方熙何瑄爲庶
吉士并令王直教習今人但知徐理即有貞爲首不
知其有尹昌等六人也蓋一榜有前後兩庶吉士矣
若嘉靖壬辰初取錢亮許樾閔如霖衛元確段承恩
韓勗扈永通呂光洵謝九儀劉光文黃獻可劉士達

劉思唐閻樸胡守中錢籍王梅雷禮邊澐李大魁郭希顏進呈矣 上閱卷見彌封有不固者寢之尋詔復選得呂懷范瑟錢亮黃應中秦鳴夏邊沆閔如霖王珩衛元確浦應麒游居敬趙汝濂劉思唐閻樸胡守中李本趙維垣何城王壽李大魁郭希顏蓋以後選爲重也

冠帶舉人

永樂甲申翰林院試下第舉人張鉉等六十一人俱賜冠帶於國子監進學以俟後科丙戌廷試乙榜舉人周翰等二人俱賜冠帶於國子監進學餘除教官

已丑國監試下第舉人熊槩金庠等十餘人并會試中式舉人陳璩等俱寄國子監不給冠帶宣德癸丑試乙榜龍文章瑾等二十四人如張鉉例給訓導俸攷諸冠帶舉人登第者十不下六七而名世之臣不與焉

史官教庶吉士

教習庶吉士多用學士以上官亦間有及講讀者惟正統乙丑初用編修趙恢後用修撰王振

藩臬兼任

成化中湖廣右布政使陶魯兼廣東按察副使正德

中江西右布政使吳廷舉兼本省按察副使嘉靖中
山西右叅政王輪兼按察僉事山西右叅政李泰江
西右叅政張景賢浙江右叅劉濤俱兼按察副使盖
皆爲兵備地方有年勞或功賞故也以吾吳兵備言
之山東右叅政任環湖廣右叅政王叔杲俱兼按察
僉事湖廣右叅政湯賓兼按察副使凡三人近年以
來不可勝紀襄陽兵備楊一魁則陸右叅政無兼秩
吾蘇松兵備馮叔吉徐節蹇達則直爲湖廣按察使
萬曆十五年有致縉紳錄至者閱之爲駭然因記於
此亦時制一大變也

以按察使飭兵者湖廣蘄州李琦河南汝南胡緒山
西冀北王緘陝西寧夏戴光啟固原李廷儀甘州邢
玠山東齊山曹子朝四川下川南蔡國珍廣東海南
陳瑛雲南騰衝姜忻清軍邊維垣廣西賓州陳洙
以右叅政飭兵備者北直隸永平葉慶熊密雲郭四
維紫荊張修吉宣府王學書遼東海蓋郝杰山西冀
寧許雲濤陝西莊浪茹宗舜靖邊李春光岷州郭汝
河州張思忠臨鞏石櫃隴右趙焯
以右布政使掌按察司者河南王體復

特蒞鄉土

永樂中西安人楊恭自刑科給事中擢陝西右布政使開封人許廓以工部左侍郎彰德人王彰以右都御史俱巡撫河南兗州人樊敬以右通政兼行軍司馬鎮濟寧

吳人陸公完以逐流賊至吳提督軍務撫臣俱聽鄴制閩人彭公澤以平蜀寇由關中進兵後處置哈密事復摠甘肅諸鎮軍務楚人陳公金以姚源賊兼總七鎮浙人趙文華以征倭提督閩人張經徽人胡宗憲俱以備倭總督山西人則少師太宰楊公博少保大司馬王公崇古天津人右都御史劉公濤真定人

大司馬梁公夔毓俱以總督禦虜吾吳少司馬劉公畿亦以總督討徽寇俱蒞本土

節制各省

弘治以前雖有大征而文臣多係參贊即有重寄多是本省節制及隨行官軍而已正德中陸司馬完彭中丞澤破山東河南大盜兼督二省南北直隸湖廣陳尚書金破東鄉姚源盜總制江西浙江福建湖廣南直隸等處洪尚書鍾破籃駝盜總制湖廣鄖陽陝西河南四川等處嘉靖中平田州亂王新建伯守仁總督廣東廣西江西湖廣諸處拒北虜翟尚書鵬總

督宣大遼薊北直隸山西河南等處平江西寇胡尚
書宗憲總督兩浙南直隸江西福建諸處俱聽便宜
行事鎮巡等官俱聽節制

兩京文臣總督

京營兵馬例以公侯伯總督而文臣或提督或協理
南京守備例亦用公侯伯而文臣稱叅贊其奏疏行
移坐次皆出其下惟景泰初于肅愍謙以少保大司
馬稱總督軍務列武靖侯石亨上王忠毅以靖遠伯
大司馬稱總督機務坐守備寧遠伯任禮左蓋以二
公望重故優寄之後不爾也

勛臣巡撫

文臣稱巡撫而武臣內臣稱鎮守例也獨宣德中少
師隆平侯張信巡撫陝西而嗣後都御史陳鑑王文
侍郎耿九疇却稱鎮守

給事中巡撫

未樂十九年遣給事中馬俊等同尚書蹇義金純等
巡行天下撫安軍民俊往南直隸葛紹祖往四川王
勵往河南李瑒往陝西許能往浙江章雲往江西徐
初往福建陶衍往北直隸劉渙往山東劉蓋往湖廣
艾廣往廣東蕭竒往山西楊春往廣西正統十四年


命吏科都給事中張固往河南裕州兵科都給事葉盛往陳州等處勅其招撫流移耕種生理仍提督各衛所操練軍馬固守城池如有賊寇生蕪相機勦捕毋致滋蔓

錦衣一品

錦衣典親軍其後寄以調察之柄體勢日重然本非尊官也故雖紀綱門達逮杲之寵寄橫肆然綱達不過都指揮僉事杲僅指揮同知而已袁彬自都指揮出僉都府方晉橫玉正德初指揮高得材緣從父鳳柄司禮傳陞右都督終以非例於五府帶俸錢寧繼

踵此官雖貴盛之極而意猶歉之請以都指揮理事下兵部議曲爲諛解遂成不疑沿流至於陸朱極矣今攷 太保兼少傅者一人陸炳太保兼太子太傅一人朱希孝太子太傅一人劉守有左都督一人錢寧右都督一人陳寅都督同知一人余蔭已上皆掌衛督行事官校者也右都督一人錢安都督同知三人袁天章孫鈺楊俊士已上同掌衛督捕者也其它恩蔭管事左右都督如麥祥高恕黃浦之類不可勝紀矣

弁山堂別集卷八



卷之四